

Xcarta San Pablo tų tzóknilh xamigo Filemón

XATAPAJMUJUN TACHIHUIN:

Apóstol Pablo tzóknilh yuma actzu carta chatum xcanajlani Cristo huanti xuanicán Filemón. Yuma chixcú xkalhiy chatum cscujni xuanicán Onésimo huanti xtamahuanit xtachuná lantla xtlahuakoy luhua chixcuhuin yama makan quilhtamacú, chu xlá xmascujuy xtachuná la xtachín scujni. Acxni Onésimo sítzilh, chu nialh patipútulh lantla xmascujucán xtachuná lantla takalhín, xlá tzałatáxtulh c-xchic xpuchiná. Antá alh latamay c-tlanca xacachiquin Roma antani xtanuma Pablo c-pulachin. Cumu xlalapakaskoy, xan Onésimo lakapaxialhnán c-pulachin, chu Pablo tзúculh litakalhchihuinan pi calipahua Quimpuchinacan Jesús. Onésimo ni xman lipahua huampi hasta tзúculh maktayay Pablo lantla xlá xlicujma xtachihuin Dios.

Huampi Onésimo fuerza xlitaspítat xuanit c-xlacatin Filemón huanti xpuchiná, sampi huá xtamahuanit, huá xpalacata Pablo litzokniy yuma carta antani huaniy pi catláhuah tlanca litlán, camakamaklhtinampá Onésimo, huampi huaniy pi nialh chuná calipúlhcalth xtachuná la chatum xatastan cscujni huanti xman huá mapaksiy pi xtamahuanit, huata calimáxtulh xtachuná lantla xtalá huanti luhua xlicana paxquiy caj xpalacata pi na aya lipahuán Cristo.

¹Huanti ctzokma yuma carta quit Pablo huanti quintamacanucanit c-pulachin caj xpalacata pi cscujnanimá, chu clipahuán Quimpuchinacan Jesucristo. Luhua caná lipaxuhu ctzoknimán yuma carta, quit xahua quintalacan Timoteo ti quimaktayama, chu ccamacanimachán huix Filemón huanti luhua ccapaxquiyán sampi clacapastacahu lantla quincatascujni. ²Na luhua lipaxuhu cxakatli lacamakochá tamá huanti lipahuanakoy Cristo, chu antá tamacxtumikoy c-mínchic, chuná cumu la quintalacán puscát huanicán Apia, xahua Arquivo, yuma

natalanín xlicana ankahlín luhua anán tahuixcanín lantla quincamaktayanitán. ³Clacasquin pi Quintlatican Dios, xahua Quimpuchinacan Jesucristo ankahlín cacasiculanatlahuán, chu cacamaxquin tatancsní c-milatamatcán.

Pablo lichihuinan lantla kalhiy tacanajla Filemón

⁴Quit ankahlín cpxacatcatziniy Quintlatican Dios caj mimpalacata acxni ctlahuaniy oración, ⁵sampi aya quilitchihuinanacanit lantla akstitum lipahuana Quimpuchinacan Jesús, chu lakalhamankoya xlipacs huanti na xlakskatan Dios huankonit la huix.

⁶Chu na csquiniy liltán Dios pi huix huantí na lipahuana tama talipahu Dios huantí quit clipahuán, pi camaxquín liskalala laquimpi huix naakataksa xanimá lacuan xtascújut huantu xlá tlahuaputún c-quilatamtacán huantí lipahuanahu Cristo Jesús. ⁷Koxutá huix Filemón, xlicana luhua clakalhamanán, caj lantla quincalitchihuínancanítán lantla huix lakalhamankoya mintacanajlanín, xlipacs natalanín huantí unú huilakó kalhikonit takpuhuanín caj mimpalacata; chu quit na ckalhiy tapaxuhuán caj xpalacata lantla akstítum lapat.

Pablo makchihuínán Onésimo

⁸Masqui xlicana quit xapostol Cristo, chu ckalhiy limapaksín nacuaníyán huantu huix mililtáhuat, ⁹huampi quit ni chuná ctlahuama, huata cuanimán, lapí xlicana quimpaxquiya xtachuná lantla quit cpaxquiyan, lihuana calacapástacti pi quit Pablo aya ckolunittá, chu ctanuma c-pulachin caj xpalacata cumu clipahuán Cristo Jesús. ¹⁰Csquiniyán aktum tlanca liltán xpalacata Onésimo miscujni, huantí xtzalanit, sampi clacasquín nacatziya pi chú litaxtunít xtachuná lantla quinkahuasa, sampi likálhilih sasti xlatámat caj quimpalacata acxni clitakalhchihuínalh Cristo unú c-pulachin, huampi chú cmalakachanimán, chu climakatzankayán pi calakalhámanti.

¹¹Masqui xlicana pi minit quilhtamacú tama Onésimo caj xtamahuanita, chu miscujni xuanit huampi ni xlatatíy xtascújut, huampi huá chú luhua sculujua miscujni nahuán huantí chú tlan namaclacasquinahu, la huix na chuná la quit. ¹²Huá xpalacata quit climalakachanimachán; lipaxuhu camakamaklhtinampi, chu calipulhca xtachuná la quit cacchanchá. ¹³Quit

ctilakátilh, ctipuhua pi catamakáxtakli laquimpi naquimaktayay huantu mimpalacata xlimakua ctanuma c-pulachin caj xpalacata xtachihuín Jesús. ¹⁴Huampi nitú ctlahuaputún huantu huix ni catziya, pala xamaktum ni namatlaniya, xahuachí laquimpi ni napuhua pala luhua fuerza clacasquín naquimaktayaya sampi chuná lakchán, huata clacasquín, pala xlicana quimaktayaputuna, man calacapástacti, chu catapaxuhuán caquimaktaya. ¹⁵Cpuhuán pi Dios lacásquilh nalitzalaníyán masqui ni luhua makas quilhtamacú laquimpi alistalh tlan namakamaklhtinana xtachuná lantla huantí na xlicana lipahuán Cristo, chu lipaxuhu natalatapaya caxanilihuayaj quilhtamacú c-milakstipán. ¹⁶Huampi Onésimo nialh xtachuná pala caj miscujni huantí tamahuanita, huata mininiyán capaxqui xtachuná lantla mintalá. Xlicana pi quit cpaxqui, huampi atzinú huix mininiyán napaxquiya, ni xpalacata cumu pala huix scujnimán huampi huata cumu na huá lipahuán Quimpuchinacán.

¹⁷Filemón, lapí xlicana quimpaxquiya xtachuná la mintalá, pus lipaxuhu camakamaklhtinampi Onésimo, chu cacatzi xtachuná lampala quit chanchá. ¹⁸Na lapí pala tú limakalipuhuán, usu pala tlak lakahuilanín, pus quit caquimataji. ¹⁹Quit Pablo, man quimacán, chu quiletra naclitzokniyán yuma ahuata actzu tachiuhín, chu cuaniyán: iXlipacs huantu xlá lakahuilanín quit naxxokoníyán! Huampi mininiyán luhua lihuana calacapástacti, éti luhua pulh litakalhchihuínán yama xtachihuín Cristo laquimpi nakalhiya laktáxtut? iXlicana quitaxtuy pi na huí tú quilakahuilani! ²⁰Xahuachí quit climaxtuyán xtachuná lantla quintalá, sampi ccatzíy pi lipahuana

Cristo, nā ccatziy pī paxquinana, chu naquintlahuaniyā yumā tlanca lītlan huāntu quit csquinimān, pus chunā tlan nalimakapaxuhuaya quinacú.

²¹Huā xpālacata fuerza clitzoknimān sampi quit ccatziy pī pacs naquinkalhakaxpata huāntu naclimapaksiyān, chu ccatziy pī hasta līhuā līhuacā natlahuaya huāntu quit csquinimān. ²²Nā chuna lītum clisquiniyān lītlan pī caquincaxtlahuanipī antānī nactamakaxtaka, sampi cumu huixín chunā squinipātīt Dios, pus aya clacilhāhuilīnīt pī nī

makas quilhtamacú nacanachān calakapaxialhnanān.

Pablo ahuatá xakatlīlacān Filemón

²³Luhua cānā lipaxuhu caxakatlīlacāmāchān quintalacan Epafra; huā yumā quintalacān lacxtum quintatanumā c-pulāchīn caj xpālacata Cristo Jesús. ²⁴Nā chunā caxakatlīlacāmāchān Marcos, Aristarco, Demas, xāhuā Lucas; huā yumā tī quimaktayamakó c-quintascūjut.

²⁵Clacasquín pī huā Quimpūchinacan Jesucristo cacāsiculanātlahuān xlipacs huixín.

Carta huantu titzoknikoça Hebreos

XATAPAJMUJUN TACHIHUIN:

Cumu yama judíos na litapacuhikoy hebreos, huatiyá max huanti calakmacanca yuma carta, masqui ni catzicán xatí luhua tzokli. Huanti tzokma yuma carta xcatziní pi luhua yuma hebreos huanti xlipahuankonit Cristo aya xakxtakmakamputunkoy xtaçanajlacán laquimpí nialh huij nahuán huantu xpalacata nacaliputzastalacán. Maakpuhuanitinkoy, mahuixcanikoy pi chunatiyá akstitum calipahuankolh Cristo masqui luhua huantu calakchinkolh talipuhuan xahuá patatín chuná lantla patikonit yama xalakmakán xnatlatnacán huanti Dios xlacsackonit.

Acxni xlacán xmacpuhuankoy nialh luhua xcanajlakoy pala yama Cristo huanti xlipahuankonit xlicana xkalhiy litlihuaka pi namaktayakoy c-xtapatincán, xlá maluloknikoy pi ni chuná quitaxtuy, porque yamá huanti xlipahuankonit atzinú luhua xkalhiy xlitlihuaka, chu tlanca xlatatzúcut ni xahua lantla tu kalhikoy xlipacs lactalipahu chixcuhuín, usu ángeles.

Yuma judíos xkalhikoy luhua xamakan xnatlatnacán huanti xlicana lactlanca, chu lactalipahu chixcuhuín xuanconit, pero xlá lacatancs masiyuy pi Cristo atzinu tlanca xlatatzúcut, chu nití malakchaniy ti xala catuxáhuat: masqui hua profetas, chu ángeles, chu yama xamakan lactalipahu chixcuhuín lantla Moisés, Josué, chu yama lactlanca xanapuxcun palijni huanti xamakan quilhtamacú xlamakó, chu huanti Dios xmaxquikonit xamakan xtalaccaxlán. Lantla pulacatuñ huantu lichihuínán yuma carta stalanca huan pi Cristo atzinu tlanca xlatatzúcut ni xahua xlipacs amakapitzín huanti xlatamakonit, sampi xlá xlicana pi huá xCam Dios.

Na chuna litum litaxtuy xpalacata yama takalhín huantu xmaknikoy xpalijnican judíos cata cata c-tlanca xtemplo Dios tu xuí c-Jerusalén, chu xliłakataquilhputanancán xkalhni c-xlacatín Dios, lapí puhuankoy pi yuma xkalhni takalhín xkalhiy xlakasi naxapanikocán xtalakalhincán, pus xalihuacé kalhiy xlakasi xkalhni Cristo. Sampi acxni Cristo nilh c-cruz, nialh xlasquinca xuanit pi cata cata nastajmakanicán xkalhni tantum takalhín laquimpí chuná xokonancanit nahuán xtalakalhincan chixcuhuín, sampi acxni Cristo maktum tu tamacamástalh laquimpí namaknicán, yama xkalhni huantu stjamákalh litáxtulh c-xlacatín Dios xtachuná lantla aktum txaxokón talakalhín huantu matlaníy.

Na chuna litum litaxtuy xpalacata yama tajaxni huantu judíos xputzakoy c-xlatamatcán, chu niucxni xtákskoy sampi macpuhuankoy pala kalhiy xlakasi cumu niucxni lay lacatancs xcatzikoy lapí xtalakalhincán xlicana chuná tlan lixapaxtucanit.